



Walifundishwa na Mwelimishaji

Bora Kabisa Duniani

Akawaambia, Litupeni jarife upande wa kuume wa chombo, nanyi amtapata. Basi wakatupa; wala sasa hawakuweza kulivuta tena kwa sababu ya wingi wa samaki.—Yohana 21:6.

Wanafunzi saba walifuatana. Walikuwa wamevaa mavazi ya kawaida tu ya wavuvi; walikuwa maskini wa utajiri wa dunia hii lakini matajiri katika maarifa ya ukweli, ambayo mbele za mbingu yaliwapatia cheo cha juu sana kama walimu. Hawakuwa wanafunzi katika shule za manabii, lakini kwa muda wa miaka mitatu walikuwa wamefundishwa na Mwelimishaji Bora Kabisa ambaye ulimwengu ulikuwa haujapata kumwona. Chini ya uongozi Wake walikuwa wameinuliwa, wenye uwezo na waliotakaswa, mawakala ambao kwao wanadamu wataongozwa kupata maarifa ya ile kweli....

Jioni hiyo ilikuwa nzuri, na Petro ambaye bado alikuwa anapenda sana mashua na hamu ya kuvua alipendekeza kuwa waende baharini wakavue kidogo. Katika mpango huu wote walikuwa tayari kujiunga; walihitaji chakula na mavazi, ambavyo vingepatikana kutokana na mauzo ya kazi ya uvuvi wenye mafanikio ya usiku huo. Hivyo walienda katika mashua yao, lakini hawakupata kitu. Usiku kucha walisumbuka bila mafanikio. Katika saa hizo zenye kuchosha waliongea juu ya kutokuwepo kwa Bwana wao, na wakakumbuka matukio ya ajabu waliyoyashuhudia katika huduma Yake kandokando ya bahari. Walizungumzia hali yao ya siku za usoni, wakawa na wasiwasi jinsi mambo yalivyokuwa yakiwaendea.

Muda huo wote mwangalizi aliyekuwa peke yake ufukweni aliwafuatilia kwa macho Yake, wakati Yeye Mwenyewe akiwa haonekani. Hatimaye kukapambazuka. Mashua ikakaribia pwani, wanafunzi wakaona mgeni amesimama pwani, ambaye aliwasemesha kwa kuwauliza “Wanangu mna kitoweo?” Walipojibu “La,” akawaambia, “Litupeni jarife upande wa kuume wa chombo, nanyi mtapata.” Basi, wakatupa; wala sasa hawakuweza kulivuta tena kwa sababu ya wingi wa samaki.

Yohana akamtambua mtu yule na akamwambia Petro, “Ndiye Bwana”.... Yesu aliwaita waziache nyavu na mashua zao, na alikuwa ameahidi kuwafanya wawe wavuvi wa watu. Ilikuwa ni kuwakumbusha kisa hiki na kukazia wito wao, ndiyo maana Yesu alirudia tena kufanya mwujiza huu. Kitendo Chake kilikuwa ni kuhisha agizo la utume kwa wanafunzi Wake. Kiliwaonesha kwamba kifo cha Bwana wao hakika hakikuondoa wajibu wa kufanya kazi aliyowapa. Ijapokuwa wangeondolewa ushirika wa uwepo Wake Yeye binafsi, na kukosa fedha za kujikimu kutokana na kuacha kazi yao ya awali, Mwokozi aliyefufuka bado angeendelea kuwatunza. Wakiwa katika kufanya kazi Yake, Yeye angewapatia mahitaji yao. Na Yesu alikuwa na kusudi lingine kwa kuwaambia washushe nyavu zao upande wa kulia wa mashua. Alisimama upande huo ufukweni. Huo ulikuwa upande wa imani. Kama wangepanya kazi pamoja Naye—uweza Wake wa Uungu ukiungana na jitihada za kibinadamu—wasingeshindwa kufaulu (Tumaini la Vizazi Vyote, sehemu ya 2, uk. 420 – 422).